

Қуйида келтириладиган фикрлар, ҳикматлар ижтимоий тармоқлардаги турли саҳифалардан олиб таржима қилинган. Бундан ташқари саҳобаи киромлар, улуғ олимлар, Яқин Шарқ, Осиё, Европа ва Америка мутафаккирларининг бир қатор фикрлари ҳам берилган.

Шафоат

Аллоҳ таоло Қуръони Каримнинг Зуҳо сурасида мана бундай деб марҳамат қилган:

وَلَسَوْفَ يُعْطِيكَ رَبُّكَ فَتَرْضَىٰ

«Ва тезда Роббинг сенга ато қиладир ва сен рози бўлурсан» (5-оят).

Тасаввур қияпсизми, Аллоҳ таоло Пайғамбаримиз соллаллоҳу алайҳи васалламга шундай неъматини ато қиладики, бундан севикли Ҳабибимиз рози бўладилар.

Эй Роббим! Қиёмат куни севикли Расулингга барчани шафоат қилиш ва шу сабабли умматларини жаннатга киритиш неъматини ато этиб, у зот алайҳиссаломни рози қилгин!

Бизни ҳам ана шу бахтиёр бандалар сафида айлагин!

Ҳабибимиз...

Оталарини кўрмадилар.

Оналари эса, у киши 6 ёшга етганларида вафот этдилар.

8 ёшга етганларида боболаридан айрилдилар.

Туғишган акалари йўқ, фақат эмикдошлари бор.

Фарзандларидан 6 нафари ўзлари тирик бўлган пайтларида, кўз олдиларида вафот этишган.

Бу зот тарихда ўтган улуғ инсонлар ичидаги энг буюғи, оламларга раҳмат қилиб юборилган Пайғамбаримиз соллаллоҳу алайҳи васалламдирлар.

Эй Роббим!

Агар афвинг гуноҳларни ўчирса, яхши кўришинг қанақа экан!

Агар яхши кўришинг қалбларни нурафшон этса, муҳаббатинг қанақа экан!

Агар муҳаббатинг ақлларни даҳшатга солса, Сенга яқин бўлиш қанақа экан!

Агар Сенга яқин бўлиш ғамларни кетказса, карамли важҳингга назар солиш қанақа экан!

Эй Аллоҳ! Албатта, биз Сендан афвингни, яхши кўришингни, муҳаббатингни, Сенга яқин бўлишни ва карамли важҳингга назар солишни сўраймиз, омин!

ИЙСОР

Егингиз келиб турган ошни ўзингиздан-да муҳтожроққа берсангиз, ошни егандаги лаззатдан кўра кўпроқ лаззатни туясиз. Бунинг устига яна савоб ҳам оласиз.

Бунинг номини ийсор дейилади. Ийсор — бошқани ўзидан устун қўйиб, ўзи истаб турган нарсани унга беришдир.

Бу қўли очиқликнинг энг юқори кўринишидир.

Чунки саховат — ўзида кўпроғини қолдириб, озроғини инфоқ қилишдир.

Жувд — ўзида озроғини қолдириб, кўпроғини инфоқ қилишдир.

Ийсор эса — ўзида қолдирмай, борини инфоқ қилишдир.

Абу Ҳозим раҳимахуллоқ бозорда анор растасининг ёнидан ўтиб қолдилар. Анорга бироз қараб турдилар-да, «Инша Аллоҳ, сен билан Жаннатда кўришамиз» деб, йўлларида давом этдилар.

ШУҚР ҚИЛАЙЛИК!

«Иссиқ сув», «совуқ сув» деб сувни танлаётган пайтимизда, шу сув деган неъматга муҳтож бўлиб яшаётган кўплаб инсонлар борлигини унутмайлик!

Яқинларнинг зарбаси хатарли бўлади. Чунки у яқин масофадан келади.

«Тарих муҳрлаган сўзлар»

Кишилар ўз даражаларига қараб имтиҳонга учрайдилар. Киши ўз дини (тақвоси)нинг миқдорига қараб имтиҳон қилинади.

Шайх Иброҳим Аккос

Ҳаётимдаги бурилиш, ўзгариш нуқтаси — онам телевизорни ўчириб, беркитиб қўйиб, мени ўқишга мажбур қилган куни бўлди.

“Яқинларнинг зарбаси хатарли бўлади. Чунки у яқин масофадан келади”

Бен Карсон,

Врач, нейрохирург

Интернет материалларидан тўплаб, таржима қилувчи

Нозимжон Иминжонов

muslim.uz